


02 FEBROARY 2020 NY NANOLORANA NY TOMPO



Ankehitriny, ry Tompo, vao alefanao am-piadanana araka ny teninao ny mpanomponao, fa ny masoko nahita ny famonjena avy aminao

Ry Kristianina havana, izao 02 febroary izao no ankalazantsika ny nanolorana ny Tompo tao an-tempoly izay antsointsika hoe fetin'ny Jiro masina. Fanamasinana ny jiro masina, izay mahatonga antsika rehefa manomboka ny Eokaristia manao procession mitondra ny jiro ao amin'ny Eglizy. Nefa tsara ny mampahatsiahy ary efa naverina matetika amintsika fa tsy manao "théâtre" na fampisehoana isika raha manao izany fihetsika izany fa litorjia, izany hoe asan'Andriamanitra ka mivelona izay ankalazaintsika isika. Tsy hoe mahatsiaro fotsiny fa noho ny asan'ny FANAHY MASINA ao amintsika dia sady mankalaza no mahatsiaro isika ka mivelona an'izay ankalazaina.

Androany dia mahatsiaro ny nanolorana ny Tompo tao an-tempoly isika, raha ny marina kokoa dia izy no nanolotra ny tenany, izy ilay fahazavana ka izany no mahatonga antsika androany maneho an'izany amin'ny alalan'ny fitondrana ny jiro miditra ao an-deglizy.

Vakiteny I : Malakia 3,1-4.

Tononkira : Sal. 24

Heb 2, 14618

Evanjely : Lioka 2,22-40.

Raha azavaina fohifohy ny anton'izao fankalazana izao dia : Araka ny fampianarana ao amin'ny lalàn'i Moizy ao Levitika 12, 4, rehefa tera-dahy ny vehivavy iray dia midio mandritra ny 33 andro ka tsy mahazo miseho sy miditra any an-toerana masina mandritra io fotoana io. Izany hoe manao confinement. Raha manisa isika dia ao anatin'ny fahataperan'ny andro fidiovan'i Maria taorian'ny

niterahany an'i Jesoa isika izao raha araka ny lalàn'i Moizy voalazantsika io.

Fanolorana ny Tompo tao an-tempoly noho izy lehilahy voalohan-teraka ka atao hoe masina ho an'ny Tompo (*Eksaody* 13,12-15) : ho fahatsiarovana ny nanafahan'Andriamanitra ny vahoakan'Israely nandevovina tany Ejipta ka nandripahana ny lahimatoa rehetra tao amin'ny Ejiptianina, na olona izany na biby fa namonjena kosa ny zanak'Israely. Ny voalohan-teraka amin'ny biby dia tsy maintsy vonoina atolotra ho an'ny Tompo, ny voalohan-teraka amin'ny olona kosa dia tsy vonoina fa avotana ka soloina biby : araka ny Evanjely teo dia voromailala na domohina roa no

atolotra.

Fetin'ny jiro masina, fetin'ny fahazavàna : i Kristy no « fahazavàna hanilo ny jentily » araka ny tenin'i Simeôna. Famantarana fotsiny araka izany ny jiro, eny fa na ampiasaintsika amin-javatra maro ka andraisana fitahiana noho ny finoana ananantsika aza, fa Izy Jesoa mihitsy no fahazavàna ilaintsika.

Andron'ireo nanokan-tena amin'ny fomba manokana hiaina ny fahalavorariam-pitiavana araka ny nosoritan'ny Evanjely (Mt 19,25). Andro natokana ho an'ny relijiozy, izay miezaka hitovy amin'i Jesoa natolotra ny Ray, manamasina ny tenany ho an'ny Tompo sy ho an'ny olombelona.

Isika koa avy nandray ny fahazavan'i Kristy tamin'ny Batemy dia zary fahazavana eo anivon'ny mpiara-belona ka mahatonga antsika ihany koa hanilo ny hafa tahaka an'i Kristy izay natolotra tao an-tempoly. Izay no mahatonga antsika ho EO V MISIONERA VITA BATEMY KA IRAHINA ZARY TABERNAKLA VELONA.

Henontsikai Simeona milaza ao amin'ny evanjely fa izy Kristy no fahazavana ka izay mandray azy dia lasa fahazavana tokoa saingy zary fanafintohinana kosa ho an'izay tsy mandray azy. Ambarany amintsika ny tena dikan'izao zavatra izao, rehefa nahita maso an'i Jesoa sy nitroto azy teo antanany i Simeona dia nilaza fa io ilay fahazavana hanilo ny olona rehetra sady voninahitr'Andriamanitra : *"Ary nitso-drano azy ireo i Simeôna, ka nilaza tamin'i Maria Renin'ny Zaza hoe: "Indro ity Zaza ity no voatendry ho fandavoana sy ho fananganana ny maro amin'i Israely ary ho famantarana hotoherina, ary ny fanahinao aza hotanterahin-tsabatra mba hiseho ny hevitra ny fo maro."*

Ny ankalahantsika androany 02 febroary àry dia i Jesoa manilo an'izao rehetra izao. Io no mahatonga antsika mamerimberina fa tsy maintsy i Kristy no hanana ny teny farany. Mazava koa fa tsy hanaiky izany ny ratsy fa hanao izay hanapotehina ny fahazavana izay hitantsika izany amin'izao fotoana izao io.

Fampianarana lehibe ho antsika ihany koa ny fahafahan'i Simeona sy Ana, afaka nandray ny fahazavana satria olona mivavaka izy ireo, olona miray fo tanteraka amin'Andriamanitra, tao amin'izy ireo ny Fanahy Masina ka afaka nandray an'i Jesoa ka nahita ny fahazavana izy ireo.

Ry Kristianina havana, tsy afaka handray ilay fahazavana isika raha tsy ny fontsika no miova, raha mbola "encombré" ny fontsika araka ny averimberintsika matetika. Mila fiovam-penitra mahery vaika isika raha te-hanao "départ vaovao" marina. Raha mbola ao anatin'ny fontsika ao ny fialonana, ny adiady, ny fitiavan-tena, ao anatintsika ao ny harena tsy izy satria ny harena tokana dia Andriamanitra, feno ny fontsika ka tsy misy toerana ho an'i Jesoa intsony, maizina isika ka tsy afaka handray azy.

Amin'izao fankalazana an'i Jesoa natolotra ao an-tempoly, ny marina kokoa dia izy nanolotra ny tenany amin'ny maha-Andriamanitra azy mba ho fahazavana ho antsika olombelona. I Jesoa dia olombelona feno tanteraka tokoa noho izy nanaiky ireo lalàna mametra azy amin'ny maha-olombelona azy satria araky ny lalan'i Moizy dia tsy maintsy atolotra ao an-tempoly ny zaza voalohany rehetra. Nanaiky an'izany izy, io no manambara fa olombelona izy ary ny maha-olombelona azy no nentiny namonjeny antsika. Nanaiky ho fahotana izy izay tsy mpanota mba hanafaka antsika amin'ny fahotana ka izany no fahazavana. Raha mandray azy isika dia afaka handeha amin'ny fahazavana. Izany no ambaran'ny vakiteny voalohany ao amin'ny bokin'i Malakia mpaminany : *"tonga ao an-tempoly ny Tompo tadiavinareo"*. Tanteraka ao amin'ny fiainantsika izany hafatra izany satria isika no tempolin'Andriamanitra, isika no Eglizy. Raha isika àry no mahatsapa fa Eglizy tokoa ka afaka mitondra an'ilay fahazavana eo amin'ny manodidina antsika izay ambaran'ny mpanoratra ny taratasy ho an'ny Hebrio : *"tsy maintsy mitovy amin'ny rahalahiny amin'ny zavatra rehetra izy, hamonjeny ireo rahalahiny"*, nanaiky ho tonga olombelona i Jesoa mba ho fanilo sy fahazavana ary izany no fanavotana ho antsika. Raha miditra amin'ny fiainantsika tokoa i Jesoa dia hanavao ny fiainantsika izy ka hanavao ny fianakaviansika, ny fiaraha-monina misy

antsika, ny tontolo manodidina antsika. Izany no tsy maintsy hanaovantsika “nouveau départ”. Azo lazaina fa “nouveau départ” ihany koa ny zava-niseho tao an-tempoly tamin’ny fotoana iny.

Araka ny fantantsika dia nofidin'i Papa Md Jaony Paoly 2 ho andron' ny Voatokana androany, nofidiny izany mba hahafahana mivavaka ho azy ireo manokana sy handinihan'izy ireo koa fa famantaram-pitiavana izy ireo satria io fitiavana io no tena fahazavana. Matoa i Jesoa manolo-tena dia satria ao anatin'ny fitiavana, manolotra ny tenany koa ireo Voatokana natokana ho an'Andriamanitra tahaka an'i Jesoa mba ho famantarana ny fahazavana amin'ny alalan'ny fiainany manontolo fa nahafof ho an'Andriamanitra izy ireo ka mahafof, manompo ny olombelona. Maro ny zavatra mifamahofaho ka mila manana masontsivana isika-ka enga anie ireo voatokana mba hahita sy hivelona marina ny vôlekasiony araka ny vavaka ataontsika : Omeo relijiozy vonona sy mahafof tena ny Eglizinao, ho vavolombelon'ny Fitiavanao, hatrany amin'ny faravazan-tany.

Ry Kristianina havana amin'izao taonan'I Md Josefa ka hivavahana manokana ho an'ny Ray izao, amin'izao taonan'ny fianakaviana izao mba ho fianakaviana “eglizy kely” tahaka ny Fianakaviana Masina nanolotra an'I Jesoa tao an-Tempoly dia aoka isika EOVI MISIONERA hahay hanararaotra izao fotoana izao handinika ny vôlekasion'ny Ray, handinika ny vôlekasion'ny fianakaviana araka ireny torolalana nomena antsika ireny. Mitodika manokana amintsika ray aman-dreny mangataka batemy aho.

Mbola zazakely i Jesoa no natolotr i Maria sy Jôsefa tany an-Tempoly, toy izany koa no ataonareo ray aman-dreny rehetra mitondra ny zanakareo atao Batemy. Adidy aman'andraikitra lehibe tsy maintsy tanterahina izany. Hitantsika eto fa tsy vitan'ny nanolotra fotsiny i Josefa sy Maria fa nanabe azy ao anatin'ny tontolo mikolokolo ny fifandraisana amin'Andriamanitra. Tadidintsika fa araky nolazain'ny Evanjely fa isan-taona no mandeha manao pelerinajy any Jerosalema izy ireo. Mila tontolo mikolokolo ny fifandraisana ny zanantsika raha tiantsika hanana fivelarana marina.

Raha ny tena marina, dia tsy hoe natolotra ihany i Jesoa fa azo lazaina hoe efa nanolo-tena ihany koa Izy. Ny fiainany manontolo taty aoriana no manamarina izany. Amin izao fankalazana izao àry dia andeha isika mianakavy efa vory saina, tanora sy olon-dehibe, hanolotra ny fiainantsika manontolo amin' Andriamanitra. Marina fa anio dia Andro maneran-tany ivavahana ho an'ireo ao anatin'ny Fanokanan-tena manokana; fa na izany aza dia isika vita Batemy rehetra mihitsy no efa natokan'Andriamanitra ho Azy, ary antsoina hatrany hanokan-tena sy hanolo-tena ho Azy sy ho an'ny namana. Ny hoe Kristianina araka ny efa fantatsika dia avy amin'i Kristy. Aoka isika àry hivelona izany anaran'izany dia ho tahaka an'i Simeona sy Ana nandray an'I Kristy an-kafaliana ary nanolotra Azy. Mandray Azy no ataontsika amin'ny Eokaristia, Izy no fahazavana, isika koa manolotra ny tenantsika, manome ny tenantsika, izay midika fa mahafof sy manompo an'ireo manodidina antsika, izany ny fiainan'ny Voatokana. Noho ny Batemy hoy isika dia voatokana isika ka zary EOVI MISIONERA VITA BATEMY KA IRAHINA ZARY TABERNAKLA VELONA.

Ry Kristianina havana, aoka mba hivelona bebe kokoa an'izao andro lehibe izao isika, andron'ny jiro masina, antoky ny fahazavana dia i Kristy. Isika no jiro masina eo amin'ny mpiara-belona amintsika, hitondra ny fahamarinan'i Kristy isika, hampanjaka ny rariny sy hitsiny ao amin'i Kristy sy amin'ny alalany ariamiraka Aminy. Hivelona ny fitiavan'i Kristy ka ho mpampihavana isika amin'ny ataontsika rehetra. Izany no ivelomantsika ity taom-pikatrahona ity izay taonan'I Md Josefa sy taonan'ny fianakaviana hanaovantsika “départ vaovao”. Koa mba ho fahazavana koa anie isika ka hivelona ny maha-fianakaviana, eglizy kely miara-mivavaka, mandalim-pinoana, miaro, miambina, mikolokolo ny zavaboary. Hiezaka hamboly hazo sy hiaro ny tontolo manodidina antsika mba hanambarana fa famantaram-pamonjena tokoa ny fiainantsika manontolo. Masina Maria, Md Josefa mivavahà ho an'ny Ray rehetra mba hivelona ny vokasiony, mivavahà ho anay mba ho fianakaviana “eglizy kely” tokoa ny fianakavianay. Amen

Mompera Arseveka Mgr Benjamin Ramaroson